

## DEIGRYN HIRAETH

AR OL

# Evan Lewis

MAB IEUAF THOMAS LEWIS, PENRHEOL COTTAGE,  
BERTH, GER TREGARON, CEREDIGION,

Yr hwn a fu farw ar ei ffordd adref o Faes y Gad, yn y  
29th Stationary Hospital, Turin, ar y 10fed o Ebrill, 1919,

YN 26 MLWYDD OED.



Mi blyga 'mhen, a deigrin ar fy ngrndd,  
Mewn hiraeth dwys, yn wan a llwyd fy ngwedd ;  
A chanaf gân a'i nodau oll yn brudd,  
Wrth roi 'nghyfeillion goreu yn y bedd.

Fy nghefnder hoff! 'rol cefnu ar y drin,  
A'th wyneb annwyl tua thy dy dad,  
Eto, 'roedd angau'n sefyll ar y ffin,  
I'th rwystro 'nol i gôl dy annwyl wlad.

Yng ngwanwyn oes, ar ddechreu gyrfa wen,  
Gofynnwyd iti wisgo'r gloew gledd ;  
Dywedaist tithau'n ufudd iawn, "Amen."  
Mi af i rithid llwyr, neu ynteu fedd."

Y gorchwyl cyntaf wnaeth dy annwyl fam  
Oedd siglo'th grud, cyn iddi groesi'r don ;  
Ac O! ni fynnai iti byth gael cam—  
Mor dlws y cysget ar ei thyner fron.

Ond dros dy wlad y rhoist dy fywyd pur,  
A thros dy wlad 'rwyd heddyw yn y bedd ;  
A phe bai'th farwol ran yng Ngwalia dir,  
I'm hysbryd rhoddai hynny fwy o hedd.

Dihengaist pan yn cychwyn ar dy daith  
I uno â byddinoedd arall wlad ;  
Ond O! o'th ol gadewaist ddyfnaf graith  
A saif yn hir ar galon drom dy dad.

Os marw wnest mewn rhyw estronol dir,  
Os cefaist gan dy hen elynion gam,  
Gwladgarwch sydd yn llosgi ar y mur,  
Nes gwneud dy fedd yn wyn yng ngoleu'r fflam.

Mae swn galaru yn yr awel oer,  
Wrth suo-ganu heibio i ddrws dy dad ;  
A deigrin sydd ar wyneb llwyd y lloer,  
Yn adrodd hen hanesion erch y gad.

Dymunwn pe bae'th fedd yng Nghymru dlos,  
I mi gael plannu blodyn hardd ei liw  
Ymysg y glaswellt gyda brig y nos,  
I ddangos dy fod tithau eto'n fyw.

Mae hiraeth arnom am dy gwmni llon,  
Dy ddifyr eiriau mwyn, a'th siriol wên ;  
Y maent mor newydd ini'r funud hon,  
Ni fedr amser byth eu gwneud yn hen.

Gadewaist hen fythynod Cymru wen,  
Ac yn eu mysg hen fwthyn gwyn dy dad ;  
Dy gartref heddyw sydd tudraw i'r llen,  
Ymysg palasau teg dedwyddach gwlad.

Ffarwel yn awr! Daw utgorn Duw ryw ddydd  
I'th alw di o'th bell estronol fedd!  
Cei godi'n iach ac yn dragwyddol rydd,  
I rodio meysydd gwynion gwlad yr hedd.

T. H. LEWIS

GWRON aberthodd gariad,—brwd enaid  
Llon Brydeiniwr gwiwfad ;  
A'i ffun i'w hamddiffyniad,  
Rhuddwaed glew dros ryddid gwlad.

Ar fyddin trais herfeiddiol—wynebai  
Yn aberth gwirfoddol ;  
Glewdeg wron gwladgarol,  
Gwaedu wnaeth i'w gadw yn ol.

AP HEFIN.